

Interpretacion cu por cambia validez di nos Eleccion si piki pieu

Semper mi ta bisa cu nos leynan a bira di un manera, cu **"tur hende ta interpreta nan manera nan kier y na conveniencia di esun cu nan kier"**. Djs tira un bista riba e agresion contra un camarografo di television diabierna: **"Agresion, intimidacion, menaza, maltrato cu arma, destruccion di propiedad di otro"** y e malhechor ta wordo laga liber.

Otro biaha ta haya cu Janchi Kokodek ta para agresivo dilanti un persona, of ta usa palabranan di: **"mihor bo stop cu esey sino fono"** of e ta menasa cu **"mi ta bin caba cu bo si bo sigui"**, entre otro y Janchi Kokodek tin cu keda cera un of mas dia, of e caso ta bay dilanti huez, despues di tanto siman cu Janchi Kokodek ta cera.

Ora mira e caso di desaparicion di Natalee Holloway, ta ripara cu abogadonan a bira asina diligente, cu **"tur vruminga cu nan por piki"** den ley, segun **"nan interpretacion"**, ta bon pa entama un caso dilanti huez.

Nan a keda piki y lanta caso y perde y perde.

Nunca un acusado na Aruba anteriormente, un **ARUBANO**, a logra haya asina **"bon trabao diligente y interesa"** di su abogado, manera den e caso aki.

Den eleccion tambe nos tin nos interpretacionnan cu ta varia, te cu bo ta puntra bo mes si nos tin cu biba cu ilegalidad te dia cu esaki bira grandi, of si ta tuma paso di awor caba pa evita invalidez of ilegalidad. Mi ta asina bobo, y asina sokete cu pa esnan studia, mi tin cu cuminsa bay school atrobe, si mi publica lo siguiente.

Como un **"dommekop"**, manera tabata ser bisa tempo cu mi tabata bay school, mi ta hacie tog y kizas lo tin siquiera un persona cu lo compronde kico mi **"bobeza"** ta trece dilanti aki.

NOS FLAMANTE ELECTORALE RAAD

Na 2001 Aruba a haya un asina yama **Electorale Raad**, segun **AB 2001 nr. 96**. E instancia aki a cuminsa caba cu un conflicto cu ta robez. President di e **Electorale Raad (ER)** ta sali for di Ministerio Publico (Corte di Husticia.)

Mañan cu tin un conflicto di **ER**, mester bay corte y ta e mes Corte di Husticia, cu su representante como president di **ER**, mester huzga imparcial.

E conseho aki, **ER**, tin su vice president saliendo for di Rekenkamer, pero e otro 3 miembronan di e 5, ta miembronan **"benoemd door politieke partijen"** y ta menciona **"esnan cu a haya mas tanto voto"** den eleccion anterior.

Pero prome cu a institui e **ER**, **no tabata existi "politieke partijen"**. Prome cu 2001 e ley tabata papia di **"politieke groeperingen"**, **no di "partidonan politico"**.

E asina yama **"politieke groeperingen"** no tabata ser existi tampoco cu nan mester ta un **"rechtspersoonlijkheid"**. Ta despues esaki a bini como exigencianan di **ER**, segun e **AB** menciona.

Esaki ta muestra e ora ey cu **TUR** e partidonan cu ta tuma parti den eleccion actual, ta partidonan politico **NOBO**.

E asina yama **AB 2001 nr. 96**, no ta menciona cu **"Politieke partijen"** ta hereda derechonan di e **"Politieke groeperingen"** di prome cu 2001 y awe, 4 aña despues, **"e no ta regula tampoco"**.

E conseho aki, **ER**, ta te na comienzo di luna pa, luna di juli, a haya MEP, AVP y PPA nombrando miembronan, y a sinta hunto cu e 2 otronan y a dicidi cu e partidonan ta hereda e derechonan manera menciona ariba.

Esaki mi por splicja den e forma aki: **"Mi tin yiunan cu mi señora, mi a fayece, y ta mi "yiunan di afo" ta dicidi riba nan mes, cu nan ta e herederonan"**.

Pues, loke a pasa ta cu asina cu e 3 representantenan aki a determina cu nan ta miembro, ta bin dilanti e dunamento di sosten cu firma di listanan.

E 3 partidonan miembro di **ER** a dicidi cu **"nan no mester di sosten"** di ciudadanonan pero e otronan si. Esaki a bira decision di **ER** pasobra e 3 miembronan (politico) tin mayoria ey den.

E decision aki a crea un distincion entre e listanan di candidatonan, pasobra no ta **TUR** lista tin chens **IGUAL** pa busca votador.

No lubida cu nos leynan relaciona cu eleccion ta menciona cu **"ledere in Aruba woonachtig Nederlander"**, cu ta cada hulandes residencia na Aruba, tin derecho **IGUAL** di wordo eligi. E asina skirbi **"gelijkelijk recht verkozen te worden"**.

Pues si un partido mester di sosten, y otro partidonan no, no por papia aki di **"Gelijkelijk recht"**. Mester menciona, cu excepcion cu

tin ta, cu si huez kita e derecho aki di bo, pa cierto motibonan.

NO TIN IGUALDAD DEN DERECHO

Si tira bista riba e artikel 1. 22 di Wettelijke Voorschriften, ta ripara cu si hasta a pasa un ley cu ta **"onverenigbaar"** cu un di e **"grondrechten"** (Capitulo 1 di Constitucion), e ley no ta aplicabel. Esaki ta significa, cu e cos aki di, partidonan cu ta sostene pa firma di votadonan y partidonan sin e sosten, ta **IGUAL**, y esey ta contra constitucion. **"No tin igualdad den derecho pa wordo eligi"**.

Ban tira un bista mas leu awor.

E firmamento di lista, e dunamento di sosten aki ta **PUBLICO**. Bo ta bay censo y mira kende a firma pa kende. Pues tur hende sa kende a sostene cual partido.

Pero di e partidonan cu no a bay pa firmamento di nan lista, pasobra no mester, **NINGUN** hende sa kendenan ta sostene nan y nan ta **PARTIDONAN** y no **"groeperingen"** cu **NO TIN** sosten.

Nos no sa na e momento aki, kende ta sostene **OLA**, **AVP**, **PPA** of **MEP**.

Nan si sa kendenan a sostene e otro partidonan.

E motibo duna cu nan no mester di sosten pasobra nan tin asiento den Staten, no ta significa cu e **SOSTEN EY** tey ainda.

PROBLEMA POR BIN DEN 48 ORA

A strañami cu abogadonan cu tin den e partidonan cu mester a haya nan lista firma cu 505 firma di sostenedonan, no a cay riba e asuntonan aki y no a comenta esaki.

Awor ta buscando president y vice president pa e 52 stembureauan. Dia di eleccion, por ripara na stembureau cual partido esnan na e stembureau ta representa, pasobra por controla cu nan berdad a firma pa sostene e partido.

Pero esnan den stembureau di e otro partidonan, bo no sa cual partido nan ta representa y no por controla esaki tampoco.

Awe y mañan lo ta dia di declara listanan valido pa eleccion y esnan contra tin 48 ora of 2 dia pa apela e decision aki.

E ley ta bisa **"IEDERE KIEZER"** por apela. No a requeri tanto votador of firma pa apela. **"Cada votador"** por apela e decision aki.

Aki ta **UN** persona so por bay apela y huez **MESTER** trata e apelacion aki y tuma un di e tes decisionnan:

E por bisa (1) cu e listanan ta valido, pero e por dicidi tambe cu (2) **CADA** partido mester tin e cantidad requeri di firma y duna tempo pa

esaki tuma lugar, of (3) e huez por declara listanan sin e firmanan requeri como listanan invalido, si tin apelacion.

Indicacion ta cu despues di awe of mañan, di e 60 mil votadonan lo por sali siquiera **UN** persona cu lo dicidi di apela.

ALGUN COS CHIQUITO MAS

E pida otro cosnan pa menciona ta pone nos puntra nos mes, ta den ki sorto di sociedad nos ta trahando. Tuma por ehemplo asunto di monitor eleccion.

Ora tin eleccion rond di Mundo, riba Luna, na Mars y Jupiter, y hasta den Station Espacial Internacional, na Aruba ta gaba cu cierto personahenan a haya invitacion y a bay monitor eleccion aya.

Aki na Aruba, ningun partido a sali pa busca hende pa monitor nos eleccion, manera si ta monitor eleccionnan den exterior.

Un otro punto ta nos **UNICO** eleccion.

Nos tin un eleccion cada 4 aña, compara cu un Hulanda cu tin eleccion di (1) comunidanan, (2) provincial, (3) nacional y tambe (4) Europeo. Unda cu ta hulandesnan por vota hasta si nan ta riba luna.

Arubanonan den exterior no ta haya e oportunidad aki, esta pa vota for di exterior pa eleccion na Aruba.

Nos tin un **ER** bunita di 5 persona, pero nos flamante **Electorale Raad** no tin ni un oficina pa nan traha.

IGUALDAD CU NOS TUR TIN COMO VOTADOR

Mira eleccion na Aruba. Hopi ciudadano tin obstaculonan nan dilanti pa por deposita nan voto.

Mi ta menciona esnan den hospital cu no por sali ni move, otronan den casnan di hendenan grandi cu no por sali ni move, esnan di centronan di adicon cu ni mira nan no ta mira tarheta di votacion si nan no tin direccion, y entre otro hendenan cu involuntariamente no tin libertad di movecion. Medidanan pa tur esaki no ta ser duna.

Esaki lo ponemi pensa cu: **"cada votador no ta igual, otronan ta mas cu otro"**.

Juby Naar.